

## Te Hā o te Marama

Nā Mākere Rangitoheriri


Whatukura

### He Whakatau

Me mātua pānui kia marama rawa koe i ngā whārangi 8–14 o tēnei pukapuka.

### He whakarāpopoto

Pānuihia te whakarāpopoto ki te ākonga. Rerekē ana tēnei pō. Ki a Maki kei te pai ngā mea katoa, ko ia kei roto, ko te pō kei waho. Raruraru ana a Marāea, kei te hiahia ia ki te haere ki waho engari e pōuri ana a waho. Ka pai hoki ki a Maki te whakamataku i tana tuahine. Engari, he utu anō mō tēnei mahi.



### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Kua haere pō anō koe ki tētahi wāhi engari, kāre rawa atu koe i pirangi ki te haere? Mā ngā ākonga e whakawhitiwhiti ētahi wheako pēnei. Me tūhonohono hoki ki te haerenga o Rona me tana kanga i te marama. He aha e tino matakū nei te tangata i ngā kōrero o te pō, otirā, ēnei tokorua rawa atu? Ki ōu whakaaro he aha ngā tungāne e hiahia nei ki te whakamataku i ngā tēina, waihoki, i ngā tuāhine? He aha ki a koe te tohutohu kei roto i te kōrero o Rona. He aha hoki te tohutohu kei roto i tēnei pakiwaitara.

### He Matapaki

#### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka i a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakaputa ai ia i te wā o te whakataki.

#### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

### He whakapuaki māramatanga

1. He aha te kī atu a Maki ki a Marāea pēnā ka haere a Marāea ki waho?
2. I pēheatia te whakautu i te mahi whakato i a Maki?
3. Whakamāramahia te huarahi ka whai a Maki kia tae ai ia ki te kāinga o tana matua kēkē.
4. Whakamāramahia mai te āhua o te marama kātahi ka whakaatu mai ai pēhea ōu whakaaro mō te marama.
5. I ētahi wā ka hoki mai te mahi whakato i te kaiwhakato. He aha ai?

### Ngā whakautu ki ngā whakapuaki māramatanga

1. Ki te haere ia ki waho kua mauria ia e Rona.
2. Me haere ia ki te tiki i tana matua kēkē.
3. Ka hipa ia i te wharepuni, i te urupā, me ētahi rākau nunui.
4. He maha ngā whakautu rerekē.
5. He maha ngā whakautu rerekē.

### He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuetanga o te pukapuka nei.

### Te pūtake

**T** He tipako, he tautuhi i ētahi rerenga kōrero auhatanga.

### He whakatakinga ā-roto, he whakaharatau

Kei ētahi kōrero he whakaputa kare ā-roto. Kia taunga te ākonga i te kōrero paki, ka matapaki ai i ngā rerenga kōrero whakaputa kare ā-roto. Mā te kare ā-roto ka puta te auhatanga. Me tipako e te ākonga ētahi kianga, ētahi kupu hei matapaki tahi. Hei tauira (wh. 3):

- Kāore koe e matakū kei riro koe i te marama ...
- Kua puta mai te marama ...
- Ākuanei, ka mauria koe e te marama ...

Kātahi ka tuhi ai ētahi kupu whakaatu matakū, harikoa, mokemoke rānei. Me tāpiri rawa tētahi pikitia hei whakanikoniko i te tuhinga.